



ԾՈԱԶԱՏԿԻ ՍԱՍԻՆ ԱՐՁԱԳԱՆՔՆԵՐԸ ՅԱՅ ԵՒ ՕՏԱՐ ՍԿԶԲՆԱԴՔՈՒՐՆԵՐՈՒՄ

Ծոազատկի խնդրին նվիրված մեր նախորդ հոդվածում նշել ենք, որ էսայան եւ իրիոնյան զատկացուցականների տարբերությունների պատճառով մեկ 532-ամյակի ընթացքում 4 անգամ (95+95+95+247) պատահում էր այնպես, որ այդ զատկացուցականներով առաջնորդվող Եկեղեցիների Զատկի օրը չէր համընկնում¹: Ծոազատիկները մեծ խնդիրներ էին առաջացնում, քանի որ կապված էին Ս. Հարությունյան տոնակատարման օրվա հետ, իսկ Ս. Հարությունյան տոնը առանցքային տեղ է գրավում քրիստոնեական տոնացուցում: Ս. Հարությունյան օրը ուղենշային է շարժական տոների մեծ մասի համար. եթե չէր համընկնում Զատիկը, տարբերվում էին նաեւ մյուս շարժական տոների օրերը, ինչն առավել էր սրում խնդիրը: 532-ամյա շրջանում ծոազատիկ հանդիպում է 18-րդ, 113-րդ, 208-րդ եւ 455-րդ տարիներին: Հայկական զատկացուցականների այս տարիներին լուսնի ավագ լրումը լինում էր կիրակի՝ ապրիլի 6-ին, իսկ Զատիկը տոնվում էր մեկ շաբաթ անց²: Ծոազատկի թվականները պարզելու համար վերոնշյալ թվերը կարող ենք գումարել զատկացուցակի գործադրման առաջին թվականին՝ 552-ին: Կիրակոս Գանձակեցու վկայությամբ՝ առաջին ծոազատիկը հանդիպել է Ալեքսանդրիայի 561 թ. ժողովից ութ տարի անց³: Այս ծոազատկի ճշգրիտ ժամանակի վերաբերյալ Մաղաքիա արք. Օրմանյանը գրում է. «Այդ ծոութիւնը շուտ ալ տեղի ունեցաւ, վասն զի յետ ուր ամի երեսեցաւ եղծումն իրացն, այսինքն է՝ Էսաի 561 թ. կազմած շրջանն 8 տարի ետքը, եւ իրոք ալ 570-ին նշմարտուած է այդ տարբերութիւնը կամ

¹ Տէս Կ. ՍՐԿ. ՂԱՐԻՔՅԱՆ, Ծոազատկի առաջացման պատճառների շուրջ, «էջմիածին», 2019, Զ., էջ 11–23:

² Տէս ԿԻՐԻԵՂ ՍԵՐԱՍՏԵԱՆ, Բուն տօմար Հայոց, Կ. Պօլիս, 1760, էջ 19:

³ Տէս «Պատմութիւն Հայոց արարեալ Կիրակոսի վարդապետի Գանձակեցոյ», Թիֆլիս, 1909, էջ 44:

առաջին ծոազատիկը»⁴: 570 թ. ծոազատիկի մասին մեր մատենագիրների տեղեկությունները սահմանափակվում են այսքանով:

Հաջորդ երկու՝ 665 եւ 760 թթ. ծոազատիկների մասին մատենագրական տեղեկությունները նույնպես սակավ են: Մաղաքիա արք. Օրմանյանը նույնիսկ խոսում է դրանց բացակայության մասին. «[Ծոազատիկ] 570 թուականէն ետքը երկու անգամ եւս տեղի ունեցած էր 665-ին եւ 750-ին, 95 տարիներու հեռաւորութեամբ, որոնց մասին պատմական յիշատակներ չեն հասած»⁵:

Մատենագիրների լուծությունը կարող էր պայմանավորված լինել այն հանգամանքով, որ այս ժամանակաշրջանում Զատիկի տոնակատարման հարցի շուրջ շարունակում էին վիճել Եկեղեցու նշանավոր աթոռներից Հռոմը եւ Ալեքսանդրիան, այդ վեճերը շարունակվեցին մինչեւ Թ. դար⁶: Քրիստոնյա Արեւմուտքից քաղաքական իրավիճակի պատճառով մեկուսացած Հայ Առաքելական Սուրբ Եկեղեցում Զատիկի տոնակատարման օրվա չհամընկնելը կարող էր լուրջ քննարկումների պատճառ չդառնալ: Բացի այդ՝ նշված դարերում Հայ Եկեղեցուն լծակից Ասորական Եկեղեցին եւս առաջնորդվում էր էասյան զատկացուցակով: Այսինքն՝ Քույր եկեղեցու հետ այս հարցում խնդիրներ չկային:

Մաղաքիա արք. Օրմանյանը 665 թ. ծոազատիկը կապում է Անանիա Շիրակացու տոմարական գործունեության հետ⁷: Նրա տեսակետի իրավացիության մասին է վկայում նաեւ այն հանգամանքը, որ Անանիա Շիրակացին իր «Զատիկի ճառում» մանրամասն քննում է ծոազատիկի հանգամանքները եւ սերունդներին պատվիրում հավատարիմ մնալ էասյան զատկացուցակով Զատիկը տոնելուն եւ խուսափել նզովքի տակ ընկնելուց⁸: 665 թ. տեղի ունեցած ծոազատիկը տոմարական մեծ նշանակություն ունեցող իրադարձություն էր ժամանակի համար: Առաջացած խնդիրը կարող էր դրդել ժամանակի կաթողիկոսին ուսումնառությունից ետ կանչել Անանիա Շիրակացուն, որպեսզի վերջինս լուծեր հրատապ դարձած տոմարական խնդիրները⁹:

⁴ ՄԱՂԱՔԻԱ ԱՐՔ. ՕՐՄԱՆՅԱՆ, Ազգապատում, հտ. Ա., Ս. էջմիածին, 2001, էջ 663:

⁵ Մ. ԱՐՔ. ՕՐՄԱՆՅԱՆ, Ազգապատում, հտ. Ա., էջ 1361–1362:

⁶ ՏԷՄ Զ. ԵՊՍ. ՏԵՐ-ՅԱԿՈԲԵԱՆ, Զատիկի հարցը, Պէյրուս, 1971, էջ 47–49:

⁷ Մ. ԱՐՔ. ՕՐՄԱՆՅԱՆ, Ազգապատում, հտ. Ա., էջ 870:

⁸ ՏԷՄ Ա. ԱՐՐԱՀԱՄՅԱՆ, Անանիա Շիրակացու մատենագրությունը, Երեւան, 1944, էջ 298–299:

⁹ ՏԷՄ ԳՐ. ԲՐՈՒՏԵԱՆ, Անանիայի «Քննիկոնի» ստեղծման հանգամանքների մասին, «Բազմավէպ», 2016, թիւ 1–2, էջ 24:

760 թ. ծնագատիկի մասին մեր մատենագիրները երկերում հիշատակություններ առկա չեն: Հիշատակություն է պահպանել բյուզանդացի պատմիչ Թեոփանես Խոստովանողը: Հեղինակը գրում է. «Այդ տարի ծնագատիկ եղավ, Արեւելի ուղղափառները Զատիկ արեցին ապրիլի 6-ին, իսկ մոլորված հերետիկոսները՝ 13-ին»¹⁰: Հաշվի առնելով Թեոփանես Խոստովանողի բյուզանդացի լինելը՝ խնդրի վերաբերյալ նրա գիրքորոշումը հասկանալի է: Ուշագրավ է այն հանգամանքը, որ բյուզանդացի հեղինակները, ի տարբերություն հայ մատենագիրների, ծնագատիկին անդրադառնալիս լռում են այդ տարիներին իրիոնյան համակարգով հաշվարկված Զատիկի՝ հրեական պատեքի հետ համընկնելու մասին:

Առաջին 532-ամյա շրջանի հաջորդ ծնագատիկը տեղի է ունեցել 760-ից 247 տարի անց՝ 1007 թ.: Մաղաքիա արք. Օրմանյանը նշում է, որ 247 տարվա ընդմիջումը ծնագատիկի մոռացության պատճառ էր դարձել¹¹: Այս ծնագատիկի մասին վկայություններ ունեն Սամուել Անեցին¹², Մատթեոս Ուռհայեցին¹³ եւ Սմբատ Սպարապետը¹⁴: Սամուել Անեցին միայն նշում է, որ հույների մոլորության պատճառով «ոչ վառեցաւ լոյսն յԵրուսաղէմ յանմ ատուր, վասն որոյ կոտորեցին անօրէնքն ի քրիստոնէիցն ժմ...»¹⁵: Այս դեպքերին մանրամասն անդրադառնում է Մատթեոս Ուռհայեցին. «...մեծ խռովութիւն եղեւ ի քաղաքն Կոստանդնուպօլիս եւ ամենայն աշխարհն Յունաց, վասն զի ատուր մեծի Զատիկն մոլորեալ եղեն ի կատարեղոյ զսուրբ Յարութեան օրն Զատիկն. եւ ամենայն վարդապետք տանն Յունաց ընդ ստութեամբ փակեցին զուղղորդ պատուիրանս Աստուածաշունչ Գրոց եւ զսուտ եւ զխաբեքայ տումարն հակառակամարտն Իրիոնի ընկալան, եւ զնշմարտագիր տումարն մեծին Անդրէասայ ոչ ընկալան, այլ ածին նոքա զլրումն Զատիկն ի կիրակիէն ի շաբաթն, եւ զկնի ատուր միոյ Զատիկ արարին, զոր պարտ էր զկնի ուր ատուրն կատարել. եւ ամենայն տանն Յունաց մոլորեալ ի սուրբ Զատիկէն, եւ եղեւ սուգ մեծ ի վերայ սուրբ եկեղեցոյն Կոստանդնուպօլսի, եւս առաւել ի սուրբ եւ յաստուածակերտ քաղաքն Երուսաղէմ, զի

¹⁰ ԹԵՈՓԱՆԵՍ ԽՈՍՏՈՎԱՆՈՂ, Ժամանակագրություն, Թարգմանություն բնագրից, առաջ. եւ ծանոթ.՝ Հր. Բարթիկյանի, Երեւան, 1983, էջ 143:

¹¹ Տէս Մ. ԱՐՔ. ՕՐՄԱՆԵՅԱՆ, Ազգապատում, հտ. Ա., էջ 1362:

¹² Տէս «Սամուէլ Անեցի եւ շարունակողներ. Ժամանակագրութիւն», աշխ.՝ Կ. Մատթեոսյանի, Երեւան, 2014, էջ 181:

¹³ Տէս ՄԱՏԹԷՈՍ ՈՒՐՀԱՅԵՅԻ, Ժամանակագրութիւն, գրաբար բնագիրը՝ Մ. Մելիք-Աղամյանի եւ Ն. Տեր-Միքայելյանի, Երեւան, 1991, էջ 48–52:

¹⁴ Տէս «Տարեգրք Սմբատայ Սպարապետի», Փարիզ, 1859, էջ 42–44:

¹⁵ «Սամուէլ Անեցի եւ շարունակողներ. Ժամանակագրութիւն», էջ 181:

հպարտութեամբ բարձրավզեալ ածին Զատիկն ի ատուր Ծառգարդարին...»¹⁶: Մատթեոս Ուռհայեցին, Սամուել Անեցու նմանությամբ, ծռազատկի դեպքերը կապում է Քրիստոսի Գերեզմանին լույսի հայտնվելու հետ՝ «Եւ յայնմ Զատիկի ոչ վառեցաւ լոյս կանթեղացն ի սուրբ Գերեզմանն»¹⁷: Երուսաղեմում քրիստոնյա ազգերի միջեւ տեղի ունեցած խառնաշփոթից օգտվելով՝ տեղի «ազգն անօրինաց» կոտորեց շուրջ տասը հազար հավատացյալների. «...եւ լցաւ սուրբ Գերեզմանն Քրիստոսի արեամբ աղօթաւորացն...»¹⁸: Մատթեոս Ուռհայեցու վկայությամբ՝ Վասիլ կայսր, տեղի ունեցած դեպքերի պատճառն իմանալու համար, իր մոտ է կանչում հույն վարդապետներին: Վերջիններս հակասական պատասխաններով փորձում են մոլորեցնել նրան: Կայսրը կանչում է Հովսեփ Ընծայեցի եւ Հովհաննես Կոզեռն հայոց վարդապետներին: Վերջիններս, հրաժարվելով Կ. Պոլիս գնալ, կայսեր հարցերին պատասխանում են նամակներով: Նամակը, սակայն, չի գոհացնում հույներին, եւ կայսեր խնդրանքով հայոց Սամվել վարդապետը, որը գիտակ ու երեւելի այր էր, մեկնում է հույների հետ բանավիճելու: Մատթեոս Ուռհայեցու հավաստմամբ՝ վերջինս հաղթում է հույն վարդապետներին եւ ապացուցում հայերի ճշմարտացիությունը¹⁹: Գրեթե նույն կերպ է ներկայացնում դեպքերը նաեւ Սմբատ Սպարապետը²⁰:

Պետք է նշել, որ այս ծռազատկի հետ կապված խնդիրներ լինում էին միայն Հույն Եկեղեցու հետ, քանի որ ասորիները շարունակում էին Զատիկը տոնել էսայան զատկացուցակով, իսկ Հռոմի Եկեղեցու հետ այս շրջանում Հայ Եկեղեցին որեւէ առնչություն դեռեւս չուներ: 1007 թ. ծռազատիկը առաջին 532-ամյակի վերջին ծռազատիկն էր:

Հերթական ծռազատիկը տեղի է ունենում 1102 թ.: Դեպքերի հետ կապված հիմնական սկզբնաղբյուրը այս պարագայում եւս Մատթեոս Ուռհայեցին է: Ծռազատկի մասին համառոտ հիշատակություններ են առկա նաեւ Միքայել Ասորու²¹ եւ Սամուել Անեցու երկերում: Սամուել Անեցին գրում է. «Ի տօնի Ծառգարդի ծռազատիկ արարի տասն ազգ.

¹⁶ ՄԱՏԹԵՈՍ ՈՒՌՀԱՅԵՑԻ, Ժամանակագրություն, էջ 48:

¹⁷ Անդ, էջ 48–50:

¹⁸ Անդ, էջ 50:

¹⁹ Տէս անդ:

²⁰ Տէս «Տարեգիրք Սմբատայ Սպարապետի», էջ 42–43:

²¹ Տէս Լ. Տէր-ՊԵՏՐՈՍԵԱՆ, Ասորիների դերը հայկական Կիլիկիոյ մշակութային կեանքում ժԲ.-ԺԳ. դարերում, Վենետիկ - Ս. Ղազար, 1989, էջ 45–46:

Հայք եւ Ասորիք ուղիղ կացին...»²²: Մաղաքիա արք. Օրմանյանը գրում է, որ 1102 թ. ծռազատիկն առավել մեծ նշանակություն կունենար, «...որովհետեւ լատիններ ալ Հայոց հետ շփման մէջ կը գտնուէին, եւ յոյներու հետ համաձայն էին Իրիոնեան տոմարին հետետողութեամբ, եւ Հայոց դէմ եղողներու թիւը կ'անէր: Վրացիք արդէն Յունաց հետ կանուխէն համաձայնած էին, միայն Ասորիք կը մնային հայերուն հետ համաձայն, բայց վերջէն անոնք ալ ահաբեկ լինէին եւ դարձան ի կողմն Յունաց, եւ ուրացան զդաշինսն զորունէին ընդ Հայք...»²³: Մատթեոս Ուռհայեցիին եւ Սամուել Անեցիին վկայում են, որ Զատիկի օրը շփոթեց տասը ազգ:

Նախորդ ծռազատիկների դեպքում, ինչպես տեսանք, մատենագիրները մոլորություն մեջ մեղադրում են միայն Հուլյն Եկեղեցուն: Մատթեոս Ուռհայեցու՝ տասը ազգի մասին հիշատակությունից, ինչպես նաեւ «...Ասորիք, որ յՈւռհայ էին, ահաբեկեալք լինէին, դարձան ի կողմն Յունաց»²⁴ տեղեկությունից կարող ենք եզրակացնել, որ իրիոնյան զատկացուցկին հետեւող Հռոմի եւ Բյուզանդիայի Եկեղեցիները մյուս Եկեղեցիներին պարտադրում էին ընդունել իրենց զատկացուցակները: Տասը ազգի մոլորության պատճառ կարող էին հանդիսանալ նաեւ խաչակրաց արշավանքները, որոնց ընթացքում Հռոմեական Եկեղեցին կարող էր Արեւելքի Եկեղեցիներին պարտադրել իրիոնյան զատկացուցակի ընդունումը: Այս ծռազատիկը տարբերվում էր նաեւ նրանով, որ ավելի շատ շրջաններում են բախումներ տեղի ունենում: Միքայել Զամչյանը հայերի նկատմամբ հույների բացասական վերաբերմունքը պայմանավորում է նաեւ Հայոց Թորոս իշխանի գործունեությամբ²⁵: Հուզումներ են տեղի ունենում Ուռհա, Անտիոք քաղաքներում եւ ողջ Կիլիկիայում: Միքայել Ասորին առանձնահատուկ հիշատակում է Մելիտենեն՝ որպես բախումների վայր²⁶: Մատթեոս Ուռհայեցու վկայությամբ՝ հույները փորձում էին ստիպել հայերին ընդունել իրենց «անհաստատ» տոմարը, սակայն՝ ապարդյուն: Ուռհայի հայ քահանաները դիմում են ժամանակի կաթողիկոս Գրիգոր Բ. Վկայասերին (1066—1105 թթ.): Վերջինս պատասխանում է մի գրություն, որն ամբողջությամբ պահպանված է Մատթեոս Ուռհայեցու

²² «Սամուել Անեցի եւ շարունակողներ. Ժամանակագրություն», էջ 202:

²³ Մ. ԱՐՔ. ՕՐՄԱՆԵԱՆ, Ազգապատում, հտ. Ա. էջ 1547. նաեւ տե՛ս ՄԱՏԹԷՈՍ ՈՒՐՀԱՅԵՑԻ, Ժամանակագրություն, էջ 310—312:

²⁴ ՄԱՏԹԷՈՍ ՈՒՐՀԱՅԵՑԻ, Ժամանակագրություն, էջ 312:

²⁵ ՏԷՄ Մ. ԶԱՄՉԵԱՆ, Պատմություն Հայոց, հտ. Գ., Վենետիկ, 1784, էջ 23:

²⁶ ՏԷՄ Լ. ՏԷՐ-ՊԵՏՐՈՍԵԱՆ, նշվ. աշխ., էջ 45—46:

երկում²⁷: Գրիգոր Բ. Վկայասերն իր թղթում հայերին հորդորում է հավատարիմ մնալ Հայոց Եկեղեցու ավանդույթներին եւ կանոններին: Խոսելով Երուսաղեմում Զատիկի տոնակատարման մասին՝ Հայոց հայրապետը նշում է, որ հույները «կեղծաւորութեամբ վառեցին զոյսն եւ ոչ նշմարութեամբ եւ խաբեցին զագգն իւրեանց յօտար հոյ վառեցին զաստուածային կանթեղսն. այլ ստուգապէս վառեցաւ ի Զատիկին, որ եւ վկայեցին ամենայն հաւատացեալ, որք եւ վկայ էին ի սուրբ Բաղաբն Երուսաղէմ»²⁸:

Հաջորդ ծաղատիկը տեղի է ունեցել 95 տարի անց՝ 1197 թ.: Մեր մատենագիրներից այս ծաղատիկի մասին հիշատակում են Կիրակոս Գանձակեցին²⁹, Սամուել Անեցին³⁰ եւ Սմբատ Սպարապետը³¹: Կիրակոս Գանձակեցին հետաքրքիր տեղեկություններ է հաղորդում հայ-վրացական վեճերի մասին³²: Հեղինակը, բառացի մեջբերելով Անանիա Շիրակացու «Զատիկի ճառից», խոսում է Անդրեասի 200-ամյա տոնացույցի լրանալուց հետո քրիստոնեական Եկեղեցում սկսված խառնաշփոթի, Ալեքսանդրիայում տեղի ունեցած ժողովի, էասյան եւ իրիոնյան զատկացուցականների տարբերությունների մասին՝ «ուղիղ» համարելով էասյան զատկացուցակը: Հայ-վրացական վեճերին լուծում տալու եւ հետագա բախումներից խուսափելու նպատակով՝ վրաց Թամար թագուհու եւ Զաքարիա Սպարապետի նախաձեռնությամբ մեկական հայ ու վրաց իշխան են ուղարկվում Երուսաղեմ³³: Ինչպես նախորդ ծաղատիկների առնչությամբ իմացանք, «ուղիղ» էր համարվում այն Եկեղեցու օրացույցը, որի նշած Զատիկի օրը

²⁷ Տե՛ս «Թուղթ Գրիգորի Վկայասիրի Հայոց Վերադիտողի վասն Զատիկի», գիտաքնն. բնագիրը՝ Զ. Էյնաթյանի, «Բանբեր Մատենադարանի», թիվ 24, Երեւան, 2017, էջ 272–274:

²⁸ ՄԱՏԹԷՈՍ ՈՒՌԱՅԵՑԻ, Ժամանակագրություն, էջ 316:

²⁹ Տե՛ս «Պատմութիւն Հայոց արարեալ Կիրակոսի վարդապետի Գանձակեցույ», էջ 200–203:

³⁰ Տե՛ս «Սամուէլ Անեցի եւ շարունակողներ. Ժամանակագրութիւն», էջ 234: Սամուել Անեցու ժամանակագրութիւնը ավարտվում է 1163 թ.: Հետագայում ուրիշները, նրա ժամանակագրութիւնը շարունակելով, հասցնում են մինչեւ 1776 թ.:

³¹ Տե՛ս «Տարեգիրք Սմբատայ Սպարապետի», էջ 108–109:

³² Ինչպես գիտենք, Հայ Եկեղեցուց Վրաց Եկեղեցու բաժանումը տեղի է ունեցել է. դարասկզբին, սակայն տոմարական առումով Վրաց Եկեղեցին առանձնանում է միայն Ալեքսանդրիայի տոմարագետների ժողովից եւ դրան հակառակ իրիոնյան զատկական կարգադրությունից 220 տարի անց՝ Վրաց քրոնիկոնի տարեհաշվի սկզբնավորումով (տե՛ս Գ. ԲՐՈՒՏԵԱՆ, Վրաց եւ Աղուանից օրացույցներն ըստ Անանիա Շիրակունու տոմարի. դրանց կառուցումաձքին եւ ծագմանը վերաբերող որոշ խնդիրներ, «Հայաստանը եւ քրիստոնեալ Կովկասը» գիտաժողով նուիրուած Կովկասեան Աղուանքում եւ Վրաստանում քրիստոնէութեան ընդունման 1700-ամեակին. Զեկուցումներ եւ զեկուցումների դրոյթներ», Երեւան, 2015, էջ 58–68):

³³ Տե՛ս «Պատմութիւն Հայոց արարեալ Կիրակոսի վարդապետի Գանձակեցույ», էջ 201:

Քրիստոսի գերեզմանի վրա կանթեղը հրաշքով վառվում էր՝ «...եւ այսոցիկ դատավնիո լուցումն կանթեղին՝ որ ի Սուրբ Գերեզմանին Քրիստոսի...»³⁴։ Կիրակոս Գանձակեցին հաղորդում է, որ վեճը լուծվեց քաղաքի կառավարչի անմիջական մասնակցությամբ. «Բայց զվերակացութիւն քաղաքին Տանիկի ունէին. հարցին ցրիստոնէայսն. թէ ե՞րբ իցէ Զատիկն ձեր. պատասխանեցին որ ի յունաց եւ յայլոց ազգաց. թէ յայսմ կիրակի։ Իսկ որ ի Հայոց էին, ասացին. ոչ յայսմ կիրակէի, այլ ի միւս կիրակէի»³⁵։ Քաղաքի վերակացուն հրամայում է հույների Զատիկի օրը տաճարում եղած բոլոր լույսերը մարել, փակել է տալիս դռները ու կնքում իր մատանիով, որ ոչ ոք չկարողանա ներս մտնել. «Եւ իբրեւ անց օրն այն եւ եղեւ երեկոյ, եւ սպասէին լուցման կանթեղի, հրամայեաց իշխանն անարգանօք հանել զամենեսեան եւ զանիւ մեծաւ, իբրեւ զտգէտս եւ զսուտս, բաց ի Հայոց»³⁶։ Նույնը կրկնեցին նաեւ մեկ շաբաթ անց՝ հայերի Զատիկի օրը. «...մինչդեռ ի պաշտաման եւ յաղօթս էին ի տասներորդ ժամուն՝ ազդումն եղեւ ամենեցուն, եւ վաղվադակի լուցաւ կանթեղն առանց ձեռաց»³⁷։ Երբ Զաքարեն ու մյուս հայերը իմացան Երուսաղեմում տեղի ունեցած դեպքերի մասին, ուրախացան եւ ամրացան Հայոց ուղիղ հավատի մեջ։ Արժեքավոր է նաեւ Սամուել Անեցու տեղեկությունը. «...խանգարեցին զԶատիկն եւ ընդ աստուածասպանսն տօնեցին այլազգի, իսկ ի կատարման սրբոյ Յարութեան ատուրց, բերին յեղբարց մերոց զաւետիս լուցման կանթեղաց ի Գերեզմանէն Քրիստոսի ի մեր Զատիկն, եւ յամօթ եղեն հակառակողքն...»³⁸։

1197 թ. ծռազատիկի մասին ուշագրավ տեղեկության ենք հանդիպում ասորի մատենագիր Բար-Հեբրեոսի եկեղեցական ժամանակագրության մեջ։ Հեղինակը հաղորդում է, որ բացի ասորիներից, ղպտիներից ու հայերից՝ քրիստոնյա մյուս ազգերը շփոթեցին Սուրբ Հարություն մեծ տոնի օրը։ Հատկապես հետաքրքիր է հեղինակի տեղեկությունը հայ-վրացական բախումների մասին. «Իբրեմերը, տեսնելով, որ հայերն իրենց հետ չեն տոնում, զայրացան նրանց վրա եւ այրեցին մի հայկական եկեղեցի, որտեղ հրի ճարակ դարձավ չորս մարդ։ Լսելով այդ՝ հայերը հավաքվեցին տարբեր կողմերից եւ շուրջ 40 000 հոգով որոշեցին պատերազմել իբրեմերի հետ։ Սակայն վերջիններս եկեղեցու գնի դիմաց հայերին տվեցին հարյուր հազար

³⁴ Անդ։³⁵ Անդ, էջ 201։³⁶ Անդ, էջ 202։³⁷ Անդ։³⁸ «Սամուել Անեցի եւ շարունակողներ. Ժամանակագրութիւն», էջ 233։

դիմար, իսկ յուրաքանչյուր այրված մարդու համար հազար դիմար, եւ նրանք հաշտվեցին»³⁹: Մ. Չամչյանն այս դեպքերի մասին խոսելիս, հղում անելով նույն Բար-Հեբրեոսի երկին, նշում է ոչ թե 4, այլ 40 զոհի մասին⁴⁰: Վերջինս դեպքերի հավանական վայր է համարում Տփղիս կամ Թիֆլիս քաղաքը: Ուշագրավ է, որ հայ-վրացական վեճերին անդրադարձած Կիրակոս Գանձակեցին չի խոսում լուրջ բախումների մասին: Այս դեպքերի մասին հետաքրքիր հոդված ունի Լեւոն Մելիքսեթ-Բեկը⁴¹: Հեղինակը փորձում է պարզել դեպքերի վայրը եւ հասկանալ, թե որն է Բար-Հեբրեոսի նշած այրված եկեղեցին: Լեւոն Մելիքսեթ-Բեկը հանգում է այն եզրակացության, որ դեպքերը տեղի են ունեցել Թիֆլիս քաղաքում, եւ հրդեհվել է Ս. Քառասուն մանկանց եկեղեցին: Նա կասկածի տակ է դնում զոհված քառասուն հայի, ինչպես նաեւ հավաքված քառասուն հազար հայ բնակչության մասին տեղեկությունները՝ դրանք համարելով հեղինակի թվերը համապատասխանեցնելու ցանկության հետեւանք⁴²:

Կիլիկիայում եւ հարեւան շրջաններում ծռազատիկը մեծ բախումներ չառաջացրեց, քանի որ Լեւոն թագավորն իր հեղինակությունը ու հզորությունը կարողացավ պաշտպանել Հայ եկեղեցին հնարավոր հալածանքներից: Սակայն բախումներ եղան Կ. Պոլսում եւ Բյուզանդիայի իշխանության ներքո գտնվող այլ քաղաքներում, որտեղ բազմաթիվ հայեր էին բնակվում. «Եւ զի կային բազում հայք ի Կոստանդինուպոլիս եւ յայլ քաղաքս իշխանութեան Յունաց՝ ձեռն արկին նեղել եւ տառապեցուցանել զնոսա՝ բռնադատելով զնոսա անել եւ կատարել զամենայն ծէսս ըստ Յունաց՝ թէ ի տոնս եւ թէ յայլ իրս, եւս եւ կրկին մկրտիլ եւ դռնմիլ՝ եւ կրկին ձեռնադրիլ»⁴³: Այս ամենի մասին տեղեկանալով՝ ժամանակի կաթողիկոս Գրիգոր Զ. Ապիրատը (1194—1203 թթ.), Լեւոն իշխանի հետ խորհրդակցելով, որոշում է Ներսես Լամբրոնացուն ուղարկել Կոստանդնուպոլիս: Վերջինս իր հետ տանում էր Հայոց կաթողիկոսի ու Լեւոն իշխանի կողմից կայսերն ուղղված՝ հայերի նկատմամբ հալածանքները դադարեցնելու վերաբերյալ խնդրագիր: Կ. Պոլսում Ներսես Լամբրոնացին լավ ընդունելության է արժանանում, «զի հոչակեալ էր առ նոսա հրաշալի անուն իմաստութեան

³⁹ Մեջբերումն ըստ՝ Լ. ՏԵՐ-ՊԵՏՐՈՍԵԱՆ, Ասորիների դերը..., էջ 64—65:

⁴⁰ Տէս Մ. ՉԱՄՉԵԱՆ, Պատմութիւն Հայոց, հտ. Գ., էջ 161:

⁴¹ Տէս Ա. МЕЛИКСЕТ-БЕКОВ, О междоусобице в Тифлисе в 1197 году по поводу Кривой пасхи, «Известия Кавказского историко-археологического института в Тифлисе», т. III, Тифлис, 1925, էջ 49—56:

⁴² Տէս անդ, էջ 58—60:

⁴³ Մ. ՉԱՄՉԵԱՆ, Պատմութիւն Հայոց, հտ. Գ., էջ 162:

եւ սրբութեան նորա»⁴⁴: Կայսերը հանդիպելով՝ հանձնում է խնդրագիրն ու փորձում «հաղցրութեամբ բանից բերանոյ իւրոյ» համոզել նրան: Բայց քանի որ հույները թշնամաբար էին տրամադրված հայերի նկատմամբ, «ոչ ինչ շահեցաւ ի նոցանէ»⁴⁵:

Հաջորդ՝ 1292 թ. ծռազատիկը նախորդներից տարբերվում է նրանով, որ անհամաձայնություններ են լինում հենց հայերի մեջ: Քաղաքական իրավիճակը, մեղմ ասած, անկայուն էր: Կիրիկյան Հայաստանը գտնվում էր մամլուքների չընդհատվող արշավանքների թիրախում: Երկրի պետական իշխանությունն ստեղծված իրավիճակից միակ ելքը համարում էր դավանաբանական զիջումների դիմաց Հռոմից խոստացված օգնությունը: Բարձրաստիճան հոգեւորականների մի մասը համաձայն էր քաղաքական այս ուղեգծին: Ստեղծված իրավիճակում հանդիպում է հերթական ծռազատիկը, որը լուրջ բախումներ էր առաջացնում էասյան եւ իրիոնյան զատկացուցակներով Զատիկը տոնող Եկեղեցիների միջեւ: Ստեփանոս Օրբելյանը, այս դեպքերի մասին խոսելիս, ծռազատիկը տեղադրում է Գրիգոր է. Անավարզեցի կաթողիկոսի (1293–1307 թթ.) գահակալման երկրորդ տարում⁴⁶: Մաղաքիա արք. Օրմանյանը, անդրադառնալով Ստեփանոս Օրբելյանի վերոնշյալ տեղեկությանը, գրում է. «Խօսքը, որ կարծես թէ Անավարզեցիի կաթողիկոսութեան երկրորդ տարիին կ'ակնարկէ, պէտք է իմանալ քիչ վերը յիշուած Ստեփանոս կաթողիկոսի երկրորդ տարիին վրայ... վասն զի անհնար է 1295-ին տանիլ ծռազատիկի տարին»⁴⁷:

Միքայել Զամչյանը հայերին գրում է. «...զի ոմանք ըստ ուղիղ հաշուի յապրիլի 6 կամէին տօնել ընդ Յոյնս եւ ոմանք շաբաթով միով յետոյ»⁴⁸: Մոլորության մասին է խոսում Հեթում Պատմիչը. «Յայսմ ամի եւս մոլորեցան զԶատիկն Հայք, եւ Ասորիքն նըստորք»⁴⁹: Սպասվող ծռազատիկն արդեն սկսել էր հուզումների տեղիք տալ հայերի եւ լատինների միջեւ: Հետագա բախումներից խուսափելու նպատակով Հեթում թագավորը «կոչեաց առ ինքն զՍտեփաննոս կաթողիկոս ի Հռոմկլայէ ի Սիս եւ հաւանութեամբ նորա

⁴⁴ Անդ:

⁴⁵ Անդ:

⁴⁶ Տե՛ս «Ստեփաննոսի Սիւնեաց եպիսկոպոսի Պատմութիւն Տանն Սիսական», ի լոյս ընծաւ եւաց Մկրտիչ Էմին, Մոսկուա, 1861, էջ 327:

⁴⁷ Մ. ԱՐՔ. ՕՐԲԵԼՅԱՆ, Ազգապատում, հտ. Բ., էջ 2021:

⁴⁸ Մ. ԶԱՄՉԵԱՆ, Պատմութիւն Հայոց, հտ. Գ., էջ 286:

⁴⁹ «Հեթում Պատմիչ Թաթարաց», յեղեալ ի լատին օրինակէ ի հայ բարբառ ի ձեռն Հ. Մկրտիչ աթոռակալ վարդապետի Աւգերեան, Վենետիկ, 1842, էջ 85:

հրամայեաց ժողով գումարել եպիսկոպոսաց եւ վարդապետաց ի քաղաքի անդ»⁵⁰: Ժողովականները, քննության առնելով խնդիրը, որոշեցին Զատիկը տոնել ապրիլի 6-ին: Ժողովի որոշումները պարտադրվեցին Կիլիկիայի բոլոր եկեղեցիներին: Չնայած պարտադրանքին՝ որոշ «պարկեշտ» վանքերում եպիսկոպոսներից ու վարդապետներից շատերը չեն թարկվեցին որոշմանը՝ հետագայում ենթարկվելով հալածանքների եւ աքսորի⁵¹: Ժողովի որոշումներին չեն թարկվեցին նաեւ Երուսաղեմում եւ բուն Հայաստանում:

Անդրադառնալով 1539 թ. ծագատկին: Այս մասին հիշատակություն ունի Սամուել Անեցու շարունակողը: Վերջինս պարզապես նշում է, որ «...Յոյն արարին ծագատիկ»⁵²: Գարեգին եպս. Սրվաձառյանցի «Թորոս աղբար» գրքում պահպանվել է Զերմուկի Ս. Սարգիս վանքի աբեղա Եղիայի 1550 թ. գրած «Յայսմաւորքի» հիշատակարանը: Հեղինակը պատմում է ծագատկի հետ կապված՝ Երուսաղեմում տեղի ունեցած իրադարձությունները: Նա սխալմամբ ծագատկի թվական է համարում 1540 թ.: Այս առնչությամբ Մաղաքիա արք. Օրմանյանը նշում է. «Շփոթութիւնը կրնանք մեկնել, ըսելով թէ Հայոց 989 թուականը կը սկսէր 1539 նոյեմբէր 7-ին, եւ եթէ ջերմուկցի իր Յայսմաւորքը աւարտեց 1539 նոյեմբէրէ 1540 միջոցին, նոր Զատիկը չեկած, կրցաւ անցեալ Զատիկը միեւնոյն թուականին վերագրել եւ այնպէս յիշատակել»⁵³: Եղիա աբեղան պատմում է, որ «ազգն Հոռոմոց եւ Վրաց, Դպտաց եւ Հապաշից»⁵⁴ մեր Ծաղկազարդի օրը Զատիկ են տոնել: Նախորդ ծագատկիների ժամանակ տեղի ունեցած դեպքերից պարզ դարձավ, որ Զատիկի ճիշտ լինելու չափանիշը Քրիստոսի Գերեզմանի վրա լույսի հրաշքն էր:

Շարունակելով պատմությունը՝ հեղինակը հուշներին մեղադրում է Զատիկի օրը Քրիստոսի Գերեզմանի լույսը ոչ թէ հրաշքով, այլ «չախմախ եւ քիպրիթ»-ով վառելու մեջ: Այդ ամենը տեսնելով՝ տաճարի դռան մոտ գտնվող աշխարհիկները հռոմեացիների եւ հույների լույսը խավար անվանեցին՝ հայհույելով ու անարգելով նրանց: Մեր Զատիկի օրը՝ շաբաթ երեկոյան, թափոթի՝ Գերեզմանի շուրջը երկու անգամ պատվելուց հետո լույսը հրաշքով վառվեց: Այդ ամենի մասին փաստում են նաեւ այդտեղ

⁵⁰ Մ. ԶԱՄԵԱՆ, Պատմութիւն Հայոց, հտ. Գ., էջ 286:

⁵¹ Տէս անդ:

⁵² «Սամուէլ Անեցի եւ շարունակողներ. Ժամանակագրութիւն», էջ 312:

⁵³ Մ. ԱՐՔ. ՕՐՄԱՆԵԱՆ, Ազգապատում, հտ. Բ., էջ 2605:

⁵⁴ ԳԱՐԵԳԻՆ ՎՐԳ. ՍՐՈՒԱՆՁՏԵԱՆՑ, Թորոս աղբար, մասն Բ., Կ. Պօլիս, 1885, էջ 454—455:

գտնվող այլազգիները⁵⁵: Եղիա աբեղան որեւէ հիշատակութիւն չունի Երուսաղեմում հայերի եւ հույների բախումների վերաբերյալ: Այս մասին տեղեկութիւն ենք գտնում Աստվածատուր Եպիսկոպոսի գրքում: Հեղինակը պատմում է, որ Երուսաղեմի Հայոց Աստվածատուր պատրիարքի գահակալութեան տարիներին պատահած հերթական ծռազատիկը մեծ խռովութիւնների առիթ է դարձել Հայ եւ Հույն Եկեղեցիների միջեւ: Հայերն ստիպված են լինում դիմել Օսմանյան կառավարչին. «...եւ ի դատարանէ Մահմուդ Փաշայի առին մուրհակ. առանձին կատարել զտօն պասեֆին»⁵⁶: Հույները, այս մասին իմանալով, մեծ աղմուկ են բարձրացնում եւ բազում նեղութիւններ ու վնասներ են պատճառում հայերին: Հեղինակն այստեղ նույնպէս խոսում է լուսի խնդրի մասին՝ նշելով. «...զի լոյսն զորմէ ասէի ել այն յառաջագոյն վասն մեր»⁵⁷: Աստվածատուր պատրիարքը, տեսնելով, որ բռնութիւններ են գործադրում իր ժողովրդի նկատմամբ, դիմում է քաղաքի դատավորին: Վերջինս զենքի ուժով փորձում է կանխել բախումները⁵⁸:

Նախորդ ծռազատիկների փորձից ելնելով՝ հաջորդ՝ 1634 թ. ծռազատիկից առաջ Երուսաղեմի հայոց պատրիարք Գրիգոր Պարոնտերը, բախումներից խուսափելու համար, փորձում է բանակցութիւններ սկսել Հույն Եկեղեցու հետ: Նույնիսկ երկու-երեք անգամ հույների առաջնորդներին ճաշի է հրավիրում՝ ծռազատիկի խնդիրը քննարկելու: Սակայն վերջիններս արհամարհում են պատրիարքի նախաձեռնութիւնը՝ սպառնալով նույնիսկ նրա կյանքին⁵⁹: Ծռազատիկի խնդիրը լուծելու համար միջամտում են տեղական իշխանութիւնները: Հույներին հաջողվում է Դամասկոսի կուսակալին, որի ենթակայութեան տակ էր գտնվում Երուսաղեմը, բազմաթիվ կաշառքներով իրենց կողմը գրավել: Մեծ թվով հունադավան ուխտավորներ հավաքվել էին Երուսաղեմում ու սպառնալիքներով փորձում էին ստիպել հայերին իրենց հետ Զատիկ տոնել: Երուսաղեմի հայոց պատրիարքը 20 000 դահեկան է ծախսում քաղաքի կառավարչին եւ դատավորին համոզելու համար, որ վերջիններս կանխեն հույների ոտնձգութիւնները: Կառավարչի եւ դատավորի հրամանով

⁵⁵ Տէս անդ:

⁵⁶ ԱՍՏՈՒԱՅԱՏՈՒՐ ԵՊՍ. ՏԵՐ-ՅՈՎՀԱՆՆԵՍԵԱՆՑ, Ժամանակագրական պատմութիւն Ս. Երուսաղէմի, հտ. Ա., Երուսաղէմ, 1890, էջ 254:

⁵⁷ Անդ:

⁵⁸ Տէս անդ:

⁵⁹ Տէս Մ. ԶԱՄԶԵԱՆ, Պատմութիւն Հայոց, հտ. Գ., էջ 615:

զինաթափում են բոլոր հունադավաններին⁶⁰: Այդ նույն ժամանակ Երուսաղեմ է ժամանում ծովակալ Ահմեդ փաշան, որի հանդերձապանը հայազգի Ավետիք Բաղիշեցին էր: Վերջինս, տեղեկանալով Երուսաղեմում տեղի ունեցող իրադարձությունների մասին, Ահմեդ փաշայից օգնություն է խնդրում: Մ. Չամչյանի հաղորդած տեղեկության համաձայն՝ փաշայի ուղարկած զորքերը հույների Ջատկի օրը պաշարում են եկեղեցին՝ արգելելով վերջիններիս տոնակատարել: Մ. Չամչյանի հիշատակության հետ համաձայն չեն հետագայի ուսումնասիրողները: Այս առնչությամբ Աստվածատուր եպիսկոպոսը գրում է. «Սակայն ի պատմութեանն եւ ի դատաստանական գիրս երեւի փոքր-ինչ անհամաձայնութիւն բանից, զի ի պատմութեան գրի. «Եկեալ հազարապետին ի բաց վանեց անտի զՅոյնս եւ փակեաց զդռնոն»: Այլ վաղ Յունաց Ջատկին բացայայտ չգրէ ինչ, թէ յորո՞ւմ եւ որպէ՞ս տօնեցին զՋատիկն զի ի ժամանել նամակի կուսակալին Դամասկոսի եւ հազարապետին, եւ ի դատաստանի ի պատուիրելն փոխանորդի Յունաց շընդդիմանալ Հայոց ըստ հրամանի. Նա պատասխանի առնէ յատենի անդ, «Թէ Յոյնք տօնեցին զՋատիկն իւրեանց միով եօթնեկալ յառաջ եւ սովորական լոյսն ել վասն նոցա...»: Ի բանից աստի բացայայտ երեւի թէ Յոյնք արարեալ են Ջատիկն»⁶¹: Ինչպէս նախորդ ծռազատիկների ժամանակ, այս անգամ նույնպէս, ըստ մեր մատենագիրների, Քրիստոսի Գերեզմանի վրա լույսի իրական հրաշքը տեղի է ունենում մեր Ջատկի օրը⁶²:

Առաքել Դավրիժեցին հիշատակություն ունի մեկ հայ քահանայի եւ երկու աշխարհականի սպանության մասին: Հեղինակը նշում է, որ Մուրադ սուլթանի օրոք՝ 1634 թ., հույները ծռազատիկ արեցին: Այդ ժամանակ «...էր վէզիր Բայրամ փաշայն, որ էր ինքն յազգէն Յունաց. վասն որոյ արար երեսպաշտութիւն ազգին Յունաց, եւ զազգն Հայոց՝ թիւ ծանոյց թագաւորին, որոյ վասն բարկացաւ թագաւորն եւ եսպան ի Հայոց մէկ քահանայ եւ երկու աշխարհական»⁶³: 1634 թ. ծռազատիկն անդրադարձել է նաեւ Գրիգոր Դարանաղցին: Նա միակ հեղինակն է, որ հիշատակում է «հոռոմադավանների»՝ հրեաների հետ նույն օրը Ջատիկ տոնելու մասին: Հեղինակը նշում է, որ «հոռոմադավանները», հրեաների հետ Ջատիկ տոնելով, ընկնում են Նիկիայի հայրապետների (318) սահմանած նզովքի

⁶⁰ Տէս անդ, էջ 616:

⁶¹ Ա. ԵՊՍ. Տէր-Յովսէփ ՍԵՄԵԱՆՅԱՆ, Ժամանակագրական պատմութիւն Ս. Երուսաղէմի, հտ. Բ., էջ 321–322. տե՛ս Մ. ԱՐՔ. ՕՐՄԱՆԵԱՆ, Ազգապատում, հտ. Բ., էջ 2828:

⁶² Տէս ԳԱՐԵԳԻՆ ՎՐԳ. ՍՐՈՒԱՆՁՏԵԱՆՅԱՆ, Թորոս աղբար, էջ 432:

⁶³ «Պատմութիւն Առաքել վարդապետի Դավրիժեցւոյ», Վաղարշապատ, 1884, էջ 442:

տակ⁶⁴: Գրիգոր Դարանաղցին հիշատակում է, որ բացի հայերից, Հակոբիկյան ասորիներից, ղպտիներից եւ հաբաշներից՝ մյուս բոլորը շփոթեցին Զատիկի օրը:

Հաջորդ՝ 1729 թ. ծոազատկի նախօրեին թե՛ Հայ, թե՛ Հուլյն Եկեղեցիները, ունենալով նախորդ ծոազատիկների դառն փորձը, ջանում են ամեն կերպ խուսափել հնարավոր բախումներից: Աստվածատուր եպիսկոպոսը ներակայացնում է Երուսաղեմի պատրիարք Գրիգոր Շղթայակիրի եւ հուլյն հոգեւորականների երկխոսությունը⁶⁵:

Գրիգոր Շղթայակիր պատրիարքը հնարավոր բախումներից խուսափելու համար առաջարկում է. «...յաւուր տօնի Պասեֆի ձերոյ ոչ ոք մտցէ յեկեղեցի Սուրբ Յարութեան յազգէ մերմէ. նոյնպէս եւ ի Պասեֆի մերում ոչ ոք մտցէ անդ յազգէ ձերմէ բաց ի մշտնջենաւոր պաշտօնէից յերկուց ազգաց»⁶⁶: Այսպիսով՝ Հայ եւ Հուլյն Եկեղեցիների միջեւ նախօրոք սկսված բանակցությունների շնորհիվ հնարավոր եղավ խուսափել նախկինում տեղի ունեցած խռովություններից եւ արյունահեղություններից⁶⁷:

РЕЗЮМЕ

Ввиду различных календарных расчетов в течение одного 532-летия 4 раза случалось так, что день праздника Пасхи различных Церквей не совпадал. Так называемые «Кривые пасхи» («Цразатик») создавали большие проблемы, так как были связаны с днем празднования Святого Воскресения, занявшего центральное место в христианском календаре. День праздника Святого Воскресения является ориентиром для большей части передвижных праздников, следовательно, при несовпадении Пасхи отличались также дни других передвижных праздников. В данной статье впервые собраны и рассмотрены почти все библиографические свидетельства об исторических разногласиях, связанных с «Кривой пасхой», которые имеют важное значение в деле изучения и интерпретации взаимоотношений между Армянской и соседними Церквями.

⁶⁴ «Ժամանակագրութիւն Գրիգոր վարդապետի Կամախեցոյ կամ Դարանաղցոյ», հրատ.՝ Մեսրոպ վրդ. Նշանեան, Երուսաղէմ, 1915, էջ 237:

⁶⁵ Ա. ԵՊՍ. ՏԷՐ-ՅՈՎՀԱՆՆԷՍԵԱՆՅ, Ժամանակագրական պատմութիւն Ս. Երուսաղէմի, հտ. Բ., էջ 16–17:

⁶⁶ Անդ, էջ 17:

⁶⁷ Մ. ԶԱՄԶԵԱՆ, Պատմութիւն Հայոց, հտ. Գ., էջ 804:

SUMMARY

Due to various calendar calculations, in the same year of 532, the celebration day of the Easter did not coincide four times in various churches. Different dates of the Easter celebration caused great troubles, because they were connected to the Feast of Holy Resurrection, which occupies a central place in the Christian feast-calendar. The day of the Feast of Holy Resurrection is an indicator for most of the movable feasts; therefore if the Easter date did not coincide, the dates of other movable feasts did not coincide, either. This article for the first time brings together and examines almost all the literary evidences related to the historical events concerning different dates of the Easter celebration, which are important for the study and interpretation of the relations between the Armenian Church and neighboring churches.

